

6. oktober 2008

Inatsisartut suleriasianni § 36, imm. 1 malillugu ima Naalakkersuisunut apeqquteqaateqarpunga:

1. Nunarsuarmi aningaasaqarnikkut ajulusoornerup Kalaallit Nunaanni aatsitassaqaarnikkut inuussutissarsiuutitigut ineriartortitsinissami ilimasunneq qanoq sunnerneqartigissanersoq Naalakkersuisut nalilerpaat? Akissummi ilanngunneqaqquvoq aningaasaliisartut akornanni maannakkut killilimmik aningaasaleerusussuseqarneq.
2. Naalakkersuisut nalilerpaat maannakkut Nunarsuarmi aningaasaqarnikkut ajulusoornerup takutikkaa Kalaallit Nunaata aningaasaqarneranut ulorianarpallaassasoq Kalaallit Nunaat sanaartugassanut assigiinngitsununut piginnittoqataassappat ALCOA-p Maniitsumi aluminiummimik aatsiterivimmik sananissaanut tunngatillugu?
Uani apeqqut siunissami Kalaallit Nunaata aningaasaqarnera eqqarsaatigalugu aatsitassanik paaasinnaanermik akuersisoqaannassanersoq imaluunniit Kalaallit Nunaat piginnittoqataassanersoq Naalakkersuisunut nalilerneqaqquvoq. Akissummi ilaassapput siunissami aningaasaqarnikkut ajulusoorsinnaanerit, aatsitassanut assigiinngitsunut nunarsuarmi akit, assigisaallu Kalaallit Nunaata aningaasaqarneranut sunniuteqarsinnaasut.
3. Aatsitassaqaarnikkut inuussutissarsiorneq ilimagisatut, iluatsinngittuussangaluarpat suut inuutissarsiutit ineriartorfiusut Kalaallit Nunaata siunissami aningaasaqarneranut kivitsisuussanersut Naalakkersuisut nalilerpaat?

Tunngavilersuut

Nunarsuarmi aatsitassalerinerup ajunngittumik ingerlanera Kalaallit Nunaannullu iluaqutissatut isikkoqalenera eqqarsaatigiinnarlugu upernaaminngaanniit kingusinnerunngilaq tamatta aningaasarpassuarnik isaatitsinissamik ilimasukkatta. Ilemi aatsitassanut akit ima kusanartigisimapput allaat oqaluserilerlutigut nunami

tunisassiorfiit nammineerlutik sinneqartoorlutik ingerlasinnaangittut
ingerlatinniarlugit avataasiortut tulaassinissaatitaanerat peerneqartariaqartoq –
aatsitassaqaqarnerummi iluani nunaqavissut sulisussat amingalertussaammata!
Ilimasunneq imaannaangivippoq.

Maannakkut aningaasaqarnikkut ajulusoorneq Wall Street-mi 1929-mi
ajulusoornerujussuup kingorna ajornerpaaq ingerlavoq. Aningaasaliisartut
aningaasaliiffiit iluatseriaannartut isikkullit taamaallaat aningaasalersorpaat.
Aningaasaliissutit ajutooriataarsinnaasut unitsinneqarput. Maannakkut
apeqqutaalerpoq Kalaallit Nunaata aningaasaqarneranut qanoq sunniuteqassanersoq –
minnerunngitsumik Kalaallit Nunaanni aatsitassaqaqarnermiit inuutissarsiornissamik
ilimasunneq.

Ummannami suliluunniit aallartinnani Maamoriliup matuneqarnera, Maniitsumi Seqi
Olivinemik tingooraaffiup ulapaarfiujunnaarnera, Nanortalimmi Nalunap atanissaata
sivikillisinnaanera, minnerunngitsumillu Quadra Mining Bob Walish-p piginnittuisa
Ittoqqortoormiuni molybdæn-mik tingooraallutik tunisassiornissartik
piviusunngussanersoq naliliiffiginiaraat – aatsaat - akuersissummik ilimagisatuut
pereerunik il.il. pissutaallutik apeqquteqarpunga.

Ajortuinnarmik eqqartuiniangikkaluarpunga – kisianni naliliisinnaanera
tunngavingalugu nunarsuarmi aningaasaqarnikkut ajulusoornerup Kalaallit Nunaata
aatsitassalerinerup silarsuaanut tummarnissaa killilersimaarpaa. Maannakkut allatut
iliorsinnaangilagut neriussalluta ukiorpaaluit ingerlassanngittut nunarsuarmi
aningaasaqarniarneq ilorraap tungaanut aallarnissaa aningaasaleerusunnerlu uternissa
kissaatigissalugu.

Marie Fleischer

Attaviittoq